

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na 71. sjednici Predstavničkog doma, održanoj 3. i 10. februara 2010. godine, i na 44. sjednici Doma naroda, održanoj 9. aprila 2010. godine, usvojila je

ZAKON

O IZMJENAMA I DOPUNAMA ZAKONA O KOMUNIKACIJAMA

Član 1.

U Zakonu o komunikacijama ("Službeni glasnik BiH", br. 31/03 i 75/06) u članu 3. stav 4. iza tačke e) dodaje se nova tačka f) koja glasi:

"f) poštovanje i promoviranje ravnopravnosti spolova i uklanjanje svih oblika predstavljanja muškaraca ili žena na stereotipan i uvredljiv ili ponižavajući način."

Član 2.

U članu 36. iza stava 3. dodaje se novi stav 4. koji glasi:

"4. Pri izboru i imenovanju članova Vijeća Agencije promovirat će se ravnopravna zastupljenost oba spola, te će procenat učešća spolova u organima Agencije, u pravilu, odražavati ravnopravnu zastupljenost spolova."

Član 3.

U članu 39. stav 2. iza riječi: "a imenuje ih Parlamentarna skupština Bosne i Hercegovine." dodaje se novi tekst koji glasi: "Vijeće Agencije će pri formiranju liste kandidata preduzeti sve neophodne mjere da se osigura ravnopravna zastupljenost spolova na listi kandidata. Vijeće ministara formira prijedlog članova Vijeća Agencije posebno vodeći računa o članu 36. stav 4. ovog zakona."

Član 4.

U članu 40. stav 1. iza riječi "prijedloga" tačka se zamjenjuje zarezom i dodaju se riječi: "posebno vodeći računa o članu 36. stav 4. ovog zakona."

Član 5.

U članu 43. stav 2. iza riječi "sposobnosti" tačka se zamjenjuje zarezom i dodaju se riječi: "te preduzima sve neophodne mjere da se osigura ravnopravan položaj spolova u procesu zapošljavanja".

Iza stava 3. dodaje se novi stav 4. koji glasi:

"4. Ako u postupku zapošljavanja dva ili više kandidata podjednako ispunjavaju tražene uslove, Agencija će prednost dati kandidatu manje zastupljenog spola. Na poslovima istog stepena složenosti spolovi treba da budu ravnopravno zastupljeni."

Dosadašnji stav 4. postaje stav 5.

Član 6.

Iza člana 49. dodaje se novi član 49a. koji glasi:

"Član 49a.
Upotreba jezika

1. Izrazi napisani samo u muškom rodu odnose se podjednako na muški i ženski rod.
2. U označavanju funkcija, zvanja i titula upotrebljavat će se gender senzitivni jezik."

Član 7.

Ovaj zakon stupa na snagu osmog dana od dana objavljivanja u "Službenom glasniku BiH", a objavljuje se i u službenim glasilima entiteta.

PSBiH broj 504/10
9. aprila 2010. godine
Sarajevo

Predsjedavajući
Predstavničkog doma
Parlamentarne skupštine BiH
Dr. Milorad Živković, s. r.

Predsjedavajući
Doma naroda
Parlamentarne skupštine BiH
Sulejman Tihić, s. r.